

জুম্মার খুতবার সারাংশ

জামা'তের প্রতি হযরত মসীহ্ মাউদ (আঃ)-এর হেদায়েতপূর্ণ উপদেশ

‘হযরত মসীহ্ মওউদ (আ.)-এর লেখনীর আলোকে জামাত প্রতিষ্ঠার উদ্দেশ্য এবং আমাদের করণীয় সম্পর্কে
গুরুত্বপূর্ণ নসীহত’

সৈয়্যাদনা হযরত আমীরুল মু'মিনীন খলীফাতুল মসীহ্ আল্ খামেস (আইঃ)

বাইতুল ফুতুহ্ মসজিদ, লন্ডন, ইউকে

৬ই মার্চ ২০০৯ইং

أشهد أن لا إله إلا الله وحده لا شريك له، وأشهد أن محمداً عبده ورسوله. أما بعد فأعوذ بالله من الشيطان الرجيم *
بِسْمِ اللَّهِ الرَّحْمَنِ الرَّحِيمِ * الْحَمْدُ لِلَّهِ رَبِّ الْعَالَمِينَ * الرَّحْمَنُ الرَّحِيمِ * مَا لَكَ يَوْمَ الدِّينِ * إِيَّاكَ نَعْبُدُ وَإِيَّاكَ نَسْتَعِينُ * أَهْدِنَا
الصِّرَاطَ الْمُسْتَقِيمَ * صِرَاطَ الَّذِينَ أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ (آمين)

উচ্চারণঃ আশহাদু আন্ লা ইলাহা ইল্লাল্লাহু ওয়াহদাহু লা শারীকালাহু ওয়া আশহাদু আন্না মুহাম্মাদান আবদুহু ওয়া রাসুলুহু আন্না বা'দু ফাউযু বিল্লাহি মিনাশ্ শাইতানির রাজীম। বিসমিল্লাহির রহমানির রাহীম। আলহামদু লিল্লাহি রব্বিল আলামীন আর্ রহমানির রাহীম মালিকি ইয়াওমিদ্দিন ইয়্যাকা না'বুদু ওয়া ইয়্যাকা নাসতাঈন ইহদিনাসসিরা তাল মুস্তাকীম সিরাতাল্লাযীনা আনআমতা আলাইহীম গাইরিল মাগযুবে আলাইহীম ওয়ালায্ যোয়াল্লীনা। (আমীন)

হযূর আনোয়ার (আই.) বলেন, হযরত আকদাস মসীহ্ মওউদ (আ.) বিভিন্ন সময় জামাতকে যে নসীহত করেছেন এতে জামাত প্রতিষ্ঠার উদ্দেশ্য সম্পর্কে বলেছেন আর পাশাপাশি জামাতের সদস্যদের দায়িত্বের প্রতিও তিনি মনোযোগ আকর্ষণ করেছেন। দায়িত্ব পালন এবং এই উদ্দেশ্য অর্জনের লক্ষ্যে কৃত চেষ্টা-প্রচেষ্টার ফলে জামাতের উপর কি পরিমাণ আল্লাহ তা'লার ফযল বর্ষিত হবে তার প্রতিশ্রুতিও আল্লাহ তা'লা তাঁকে ও তাঁর জামাতকে দিয়েছেন। আল্লাহ তা'লা এই জামাতকে কত উন্নতি দিবেন তাও তাঁকে জানিয়েছেন। এর সূত্রে এখন আমি আপনাদের সম্মুখে কিছু কথা তুলে ধরবো, যাতে আমাদের দায়িত্বের প্রতি আমরা সচেতন থাকি এবং এ দায়িত্ব পালনের পাশাপাশি আমরা আল্লাহ তা'লার নৈকট্য এবং সন্তুষ্টি অর্জনকারী হতে পারি। সেসব কল্যাণের উত্তরাধিকারী হতে পারি যা জামাতের সাথে যুক্ত থাকার ফলে আমরা লাভ করবো। জামাত প্রতিষ্ঠার উদ্দেশ্যে ও লক্ষ্য বর্ণনা করতে গিয়ে হযরত মসীহ্ মওউদ (আ.) বলেন,

এই যুগও আধ্যাত্মিক যুদ্ধের যুগ, শয়তানের সাথে যুদ্ধ আরম্ভ হয়েছে। শয়তান স্বীয় প্রতারণা এবং পুরো শক্তি দিয়ে ইসলামের দুর্গের উপর আক্রমণ করছে এবং সে ইসলামকে পরাস্ত করতে চাইছে। কিন্তু খোদা তা'লা এখন শয়তানের সর্বশেষ যুদ্ধে তাকে চিরকালের জন্য পরাস্ত করার নিমিত্তে এই জামাতকে প্রতিষ্ঠা করেছেন। সৌভাগ্যবান তিনি যিনি একে চিনতে পারেন বা সনাক্ত করেন।

এরপর হযূর (আই.) বলেন, আমরা আল্লাহ তা'লার প্রতি কৃতজ্ঞ, কেননা তিনি তাঁর অপার অনুগ্রহে আমাদেরকে এই জামাতে অন্তর্ভুক্ত হবার তৌফিক দিয়েছেন। আমাদের মধ্য হতে অনেককে তাদের পূর্বপুরুষের পুণ্যের কল্যাণে এই জামাতকে চেনার তৌফিক দিয়েছেন এবং আমরা আহ্মদী পরিবারে জন্ম নিয়েছি। আবার অনেককে আল্লাহ তা'লা স্বয়ং বয়'আত করে এই জামাতে অন্তর্ভুক্ত হবার তৌফিক দিয়েছেন। এই জামাত আজ পর্যন্ত ক্রমবর্ধনশীল আর বাড়তেই থাকবে, ইনশাআল্লাহ তা'লা। আমরা যেন সেই বিশেষ দলভুক্ত হই যারা শয়তানের বিরুদ্ধে ইসলামের সর্বশেষ যুদ্ধে জয়ী হয়ে আল্লাহ তা'লার সন্তুষ্টি অর্জনকারী হয়েছে। একারণেই আজ আমাদের মধ্য হতে অনেককে

বিভিন্ন দেশে কঠিন পরিস্থিতি ও বিপদাপদের সম্মুখীন হতে হয়, কেননা আমরা এ যুগের ইমামকে মেনেছি। কিন্তু একটি মহান উদ্দেশ্য এবং লক্ষ্য পূরণের ক্ষেত্রে আমাদের এই সামান্য ত্যাগ কোনই মূল্য রাখে না। হযরত মসীহ মওউদ (আ.) আমাদেরকে সর্বদা এসব পরীক্ষা ও বিপদাপদ সম্পর্কে অবহিত করেছেন। যা তাঁর অগণিত রচনায় আজও আমাদের জন্য সংরক্ষিত রয়েছে। তিনি (আ.) একস্থানে বলেন,

এ সময় আমাকে যারা মেনেছেন তাদেরকে বাহ্যত নিজ প্রবৃত্তির সাথে চরম যুদ্ধ করতে হচ্ছে। অনেক সময় তার ভ্রাতৃত্ব বন্ধন সে ছিল হতে দেখবে। তার পার্থিব ব্যবসা-বাণিজ্যের পথে বাঁধা বা অন্তরায় সৃষ্টি করা হবে, তাকে গালি-গালাজ শুনতে হবে, তার উপর অভিসম্পাত বর্ষণ করা হবে। কিন্তু তিনি এসব কিছুই বিনিময় বা প্রতিদান আল্লাহর কাছ থেকে পাবেন।

হযরত মসীহ মওউদ (আ.) যে কথা বলে গেছেন বর্তমান যুগে বিভিন্ন দেশে তা আমরা হুবহু পূর্ণ হতে দেখছি। আর আজও যেসব আহ্মদী কুরবানী করছেন নিশ্চিতরূপে তারা আল্লাহ তা'লার পক্ষ থেকে পুরস্কার বা উত্তম প্রতিদান পাবেন। বর্তমানে বিশেষভাবে পাকিস্তানে এবং পাকিস্তানের পর ভারতেও অ-আহ্মদীরা নবাগত আহ্মদীদের উপর চরম নির্যাতন চালাচ্ছে। আল্লাহ তা'লার সন্তুষ্টির লক্ষ্যে আপনারা হযরত মসীহ মওউদ (আ.)-এর বাহিনীতে যোগ দিয়েছেন। তাই নিজ ঈমানকে দৃঢ় করে আল্লাহ তা'লার কাছে দৃঢ় পদক্ষেপ এবং অবিচলতা কামনা করত সর্বদা এবং প্রতি মুহূর্তে ধৈর্য এবং বীরত্ব প্রদর্শন করুন। আল্লাহ তা'লার সমীপে অধিক বিনত হোন। চূড়ান্ত বিজয় হযরত মসীহ মওউদ (আ.)-এর জামাতই লাভ করবে, ইনশাআল্লাহ তা'লা। যেভাবে তিনি (আ.) বলেছেন, এই শয়তানী এবং বিদ্রোহী শক্তিকে পরাভূত করার জন্য আল্লাহ তা'লা এই জামাত প্রতিষ্ঠা করেছেন। কিন্তু একটি বিষয় আমাদের সর্বদা মনে রাখতে হবে আর তা হলো, বহিঃশত্রুকে পরাস্ত করার জন্য আভ্যন্তরীণ শত্রু এবং শয়তানকে দমন করতে হবে। কেননা হযরত মসীহ মওউদ (আ.)-এর সাথে যুক্ত থাকার ফলেই আমাদের বিজয় বা সফলতা আসবে, বাহ্যিক কোন উপকরণ দ্বারা নয় বরং দোয়ার মাধ্যমে। আর দোয়া গৃহীত হবার জন্য স্বয়ং নিজেকে খোদা তা'লার ইচ্ছানুযায়ী পরিচালিত করা প্রয়োজন। এ জন্য নফসের জিহাদ আবশ্যিক। এ প্রসঙ্গে নসীহত করতে গিয়ে হযরত মসীহ মওউদ (আ:) আমাদেরকে বলেন,

প্রবৃত্তির তাড়না শিরকসম। এটা হৃদয়কে পর্দাবৃত করে। যদি মানুষ বয়'আতও করে তবুও এটি তার জন্য হেঁচটের কারণ হয়। আমাদের জামাতের শিক্ষা হচ্ছে, মানুষ যেন প্রবৃত্তির তাড়না পরিহার করে বিশুদ্ধচিত্তে খাঁটি তৌহীদের উপর প্রতিষ্ঠিত হয়।

সুতরাং একজন আহ্মদীর জন্য আবশ্যিক, সর্বপ্রকার ব্যক্তিস্বার্থ ও প্রবৃত্তির তাড়না থেকে আপন হৃদয়কে পবিত্র করে আল্লাহ তা'লার তৌহীদ প্রতিষ্ঠার কাজে ব্যাপৃত হওয়া।

হযরত মসীহ মওউদ (আ.) অন্যত্র বলেন,

আল্লাহ তা'লা বিশ্বকে খোদাভীরু এবং পবিত্র জীবনের দৃষ্টান্ত দেখাতে ইচ্ছে করেছেন আর সে উদ্দেশ্যেই তিনি এই জামাত প্রতিষ্ঠা করেছেন। তিনি পবিত্রতা কামনা করেন এবং একটি পুত-পবিত্র জামাত গঠন করাই তাঁর অভিপ্রায়।

সুতরাং বর্তমান বিশ্বে নির্লজ্জতা চরম রূপ ধারণ করেছে। আল্লাহর অধিকার প্রদানের প্রতি কারো মনোযোগ নেই আর আল্লাহর বান্দার প্রাপ্য অধিকারের প্রতিও কারো কোন দৃষ্টি নেই। সর্বত্র নৈরাজ্য ও অশান্তি বিরাজমান। আজ মুসলমানরা খোদার নাম নিয়ে, ধর্মের নামে অপর মুসলমানের গলা কাটছে। আল্লাহ তা'লা এদেরকে বিবেক খাটানোর তৌফিক দিন।

হযরত আনোয়ার (আই.) এরপর বলেন: সেসব আহ্মদী, যাদেরকে আল্লাহ তা'লা স্বাচ্ছন্দ্য প্রদান করেছেন; তারা অনেক সময় আহ্মদী হবার উদ্দেশ্যে ভুলে বসে এবং প্রয়োজনান্তিরিক্ত পার্থিব কর্মে জড়িয়ে পড়ে। জামাতী রীতি-নীতি এবং ইসলামী শিক্ষার প্রতি দৃষ্টি রাখা হয় না বলে বিভিন্ন অভিযোগ আসে। তৌহীদ প্রতিষ্ঠার জন্য যা সবচেয়ে গুরুত্বপূর্ণ কাজ আর মানব সৃষ্টির উদ্দেশ্য, অর্থাৎ ইবাদত করা এবং নামাযের হিফায়ত করা, এর প্রতি যথার্থ

মনোযোগ দেয়া হয় না। অতএব বড়ই ভয়ের ব্যাপার হবে, আমাদের মধ্য হতে কোন একজনের দুর্বলতাও যেন তাকে আল্লাহ তা'লার এই নির্দেশের সত্যনকারী না বানায়,

‘سَيَسْأَلُكَ اللَّهُ عَمَلِكُمْ وَتُجَازَىٰ بِمَا كُنتُمْ فِيهِ تَاكِلِينَ’ (সূরা হূদ: ৪৭) ‘সে তোমার পরিবারভুক্ত নয়’,

আল্লাহ না করুন, খোদা তা'লার দৃষ্টিতে কখনই কোন বয়'আত গ্রহণকারীর পদমর্যাদা যেন এমন না হয়। একথা শুনে ভয়ে আমাদের শরীরের লোম দাঁড়িয়ে যাওয়া উচিত। আল্লাহ তা'লা আমাদেরকে সেই কর্ম করার তৌফীক দিন যা তাঁর দৃষ্টিতে সৎকর্ম। আমরা নিজেদের মতে, স্বয়ং নিজেকে মনগড়া পুণ্যের মাপকাঠিকে যাচাই না করি বরং পুণ্যের সেই উচ্চ মানে অধিষ্ঠিত হবার চেষ্টা করি যা এ যুগের ইমাম তাঁর জামাতের কাছে প্রত্যাশা করেছেন।

তিনি (আ.) বলেন,

যতক্ষণ পর্যন্ত আমাদের জামাত ত্বাকওয়া অবলম্বন না করবে ততক্ষণ তারা মুক্তি পাবে না। খোদা তা'লা তাদেরকে নিরাপত্তা দিবেন না। যদিও খোদা তা'লা জামাতকে প্রতিশ্রুতি দিয়েছেন যে তিনি জামাতকে এসব বিপদাবলী হতে (এখানে প্লেগের উল্লেখ করা হয়েছে) নিরাপদ রাখবেন। কিন্তু এক্ষেত্রেও শর্ত নির্ধারণ করেছেন, لَمْ يَلْبِسُوا إِيمَانَهُمْ بِظُلْمٍ অর্থাৎ যারা নিজেদের ঈমানকে অন্যায়ের সাথে মিশ্রিত করেনি তারা নিরাপত্তা লাভ করবে। এরপর الدار (গৃহের চতুঃসীমা) সম্পর্কে প্রতিশ্রুতি দিয়েছেন। এক্ষেত্রেও শর্ত আরোপ করেছেন যে ‘ইল্লাল্লাযীনা আলাও মিন ইসতিকবারিন’ এখানে ‘আলাও’ শব্দের অর্থ হচ্ছে, বিনয়ের সাথে যে ধরনের আনুগত্য করা উচিত তা না করা। যতক্ষণ পর্যন্ত মানুষ বিশুদ্ধ চিন্তে সত্যিকার সিজদা বা আনুগত্য বলে তা না করবে ততক্ষণ পর্যন্ত সে এই দ্বার বা গৃহের চতুঃসীমায় অন্তর্ভুক্ত নয় আর তার মু'মিন হবার দাবী মূল্যহীন।

হযরত মসীহ মওউদ (আ.) অন্যত্র বলেন,

আমাদের জামাতের সদস্যরা যদি সত্যিকার অর্থেই জামাতবদ্ধ হতে চায় তাহলে তাদের একটি মতলু অবলম্বন করা উচিত। প্রবৃত্তির আকাঙ্ক্ষা এবং প্রবৃত্তির তাড়না থেকে নিজেকে রক্ষা করে এবং আল্লাহ তা'লাকে সবকিছুর উপর অগ্রাধিকার প্রদান করে। কপটতা এবং অনর্থক কর্মের ফলে মানুষ ধ্বংস হয়ে যায়। সুতরাং আমাদের সর্বদা আত্মিক বিশ্লেষণ করা উচিত।

এরপর নিজের যে চিত্র ফুটে উঠবে সেই মোতাবেক সংশোধনের চেষ্টা করা। প্রত্যেকের নফস যেন স্বয়ং তাকে সংশোধনের প্রতি ধাবিত করে।

হযরত মসীহ মওউদ (আ.) তাঁর প্রিয় জামাতের সদস্যদের নসীহত করতে গিয়ে একস্থানে বলেন,

প্রত্যেক অচেনা ব্যক্তি যার সাথে তোমার সাক্ষাত হয় সে তোমার মুখাবয়ব দেখে এবং তোমার আচার-ব্যবহার, অভ্যাস, ধৈর্য-দৃঢ়চিত্ততা এবং ঐশী নির্দেশাবলীর প্রতি অনুশীলন পর্যবেক্ষণ করে, তা কিরূপ। যদি উত্তম না হয় তাহলে সে তোমার মাধ্যমে হেঁচট খাবে। সুতরাং এ বিষয়গুলোকে স্মরণ রাখো। খোদা তা'লা এখন সত্যবাদী বা বিশ্বাসীদের জামাত গঠন করছেন। সুতরাং আমাদেরকে সত্যের দৃষ্টান্ত স্থাপন করা প্রয়োজন।

সত্য কী? এর ব্যাখ্যা করতে গিয়ে হযরত মসীহ মওউদ (আ.) বলেন,

যখন সাধারণভাবে মানুষ সত্যবাদিতা এবং সত্যশ্রয়ীকে ভালবাসে এবং সত্যকে জীবন চলার পথে পাথেয় করে নেয় তখন এই সত্যবাদিতাই সেই মহান সত্যকে আকর্ষণ করে যা খোদা তা'লাকে দর্শন করায়।

অতএব মানুষ যখন খোদাকে দর্শন করে তখন খোদা তা'লার একত্ববাদের মা'রেফত বা তত্ত্বজ্ঞানও সে লাভ করে। আর আল্লাহ তা'লার মা'রেফত যখন লাভ হয় তখন এর পূর্ণ আনুগত্যের প্রতিও সর্বদা দৃষ্টি নিবদ্ধ থাকে। আল্লাহ

তা'লাকে ভালবাসার সত্যিকার জ্ঞান লাভ হয়। সব ধরনের শিরক এর প্রতি ঘৃণা-বিদ্বেষ জন্মে। আল্লাহ তা'লার সত্যিকার বান্দা হবার সঠিক জ্ঞান লাভ হয়। আল্লাহ তা'লার খাতিরে ধৈর্য এবং বীরত্বের সাথে সব ধরনের বিপদাপদ এবং দুঃখকষ্ট সহ্য করার শক্তি সৃষ্টি হয়। আল্লাহ তা'লার উপর নির্ভরতা জন্মে। সর্বপ্রকার উন্নত আচার-আচরণ করার প্রতি মনোযোগ নিবদ্ধ হয়। মোটকথা আল্লাহর অধিকার এবং বান্দার প্রাপ্য অধিকার প্রদানের লক্ষ্যে সত্যের উন্নত দৃষ্টান্ত স্থাপনের জন্য সর্বদা এবং প্রতিটি মুহূর্ত চেষ্টিত থাকে।

হযর (আই.) বলেন, আল্লাহ করুন যাতে আমাদের মধ্য হতে প্রত্যেকে হযরত মসীহ মওউদ (আ.)-এর জামাতের সেই ব্যক্তিবর্গের মধ্যে গণ্য হই যারা ত্বাকওয়ার পথে পরিচালিত এবং তাদের মধ্যে গণ্য হই যাদের সম্পর্কে হযরত মসীহ মওউদ (আ.) বলেন,

খোদা তা'লা এই পাপাচারিতার আশুন থেকে একটি জামাতকে রক্ষা করার এবং তাদেরকে মুত্তাকী ও নিষ্ঠাবানদের দলভুক্ত করার সংকল্প করেছেন।

এই মুত্তাকীদের দল কোনটি! সে প্রসঙ্গে তিনি (আ.) বলেন,

যারা বয়'আত অনুযায়ী ধর্মকে পার্থিবতার উপর প্রাধান্য দেয়।

বয়'আত করার অর্থ হচ্ছে, বয়'আতের শর্তাবলী পালন আর সে অনুযায়ী নিজেকে গড়ার চেষ্টা করা। আল্লাহ করুন যাতে আমাদের মধ্য হতে প্রত্যেকে ধর্মকে পার্থিবতার উপর প্রাধান্য দিয়ে সেই মুত্তাকীদের দলভুক্ত হই এবং হযরত মসীহ মওউদ (আ.)-এর হাতে বয়'আতের সত্যিকার তাৎপর্য যেন অনুধাবন করি, যা তিনি বর্ণনা করেছেন। কখনও ব্যক্তিগত আকাঙ্ক্ষা পূরণকল্পে এবং আমিত্বের কারণে আমরা আল্লাহ তা'লার নির্দেশাবলীকে যেন উপেক্ষা না করি। অন্যদের জন্য অনুকরণীয় আদর্শ হোন।

তিনি (আ.) একস্থানে বলেন,

আমাদের অনুসারীদের উপর এমন এক যুগ আসবে যখন উন্নতির পর উন্নতি হবে কিন্তু এটি জানি না তা আমার যুগেই হবে নাকি আমাদের পরে হবে। খোদা তা'লা প্রতিশ্রুতি দিয়েছেন, বাদশাহ তোমার কাপড় হতে আশিস অন্বেষণ করবে। সুতরাং এটি অবশ্যই পূর্ণ হবে। এটি খোদা তা'লার সুন্নত বা রীতি, প্রথমে নিজের জন্য তিনি একটি দরিদ্র শ্রেণীকে নির্বাচন করেন এরপর তারা সফলতা এবং উন্নতি লাভ করে। আমাদের অনুসারীরা ধনী বা সম্পদশালী নয়। এটা দেখে আমরা মোটেও আশ্চর্য হচ্ছি না। এরা অবশ্যই সম্পদশালী হবে। কিন্তু পরিতাপ এজন্য, যদি এরা সম্পদশালী হয় তাহলে সেসব লোকদের মত ধর্ম সম্পর্কে উদাসীন হয়ে পার্থিবতাকে আবার প্রাধান্য না দিয়ে বসে।

এ হলো হযরত মসীহ মওউদ (আ.) কথিত মূল শব্দাবলী। জামাত উন্নতি করবেই, ইনশাআল্লাহ তা'লা। কিন্তু এই উন্নত অবস্থায় পৌঁছে কোথাও পার্থিব জগতকে আবার প্রাধান্য না দিয়ে বসে আর আল্লাহ তা'লার ব্যাপারে উদাসীন না হয়। আল্লাহ তা'লা প্রত্যেক আহমদীকে নিজ দায়-দায়িত্ব পালনের তৌফীক দিন। হযরত মসীহ মওউদ (আ.) নিজ জামাতের কাছে যে আশা-আকাঙ্ক্ষা বা প্রত্যাশা রেখেছেন সেই মাপকাঠিতে যথার্থভাবে উত্তীর্ণ হবার তৌফীক দিন। প্রত্যেক সেই মন্দকর্ম থেকে নিরাপদ রাখুন যে সম্পর্কে তিনি চিন্তিত ছিলেন। আল্লাহ করুন আমরা যেন সর্বদা তাঁর দোয়ার উত্তরাধিকারী হই।

(প্রাণ্ড সূত্র: কেন্দ্রীয় বাংলা ডেস্ক, লন্ডন)